

ՀԱՄԱԳՈՐԾԱԿՑՈՒԹՅԱՆ ՀԱՄԱՁԱՅՆԱԳԻՐ

ք. Գյումրի

«03» հոկտեմբեր 2013թ.

Հայաստանի Հանրապետության Շիրակի մարզպետարանը, ի դեմս մարզպետ Ֆելիքս Ցուլակյանի, մի կողմից, և «Հայաստանի երիտասարդ իրավաբանների ասոցիացիա» հասարակական կազմակերպությունը (հետագա տեքստում՝ Ասոցիացիա) ի դեմս Ասոցիացիայի նախագահ Կարեն Զադոյանի, մյուս կողմից (հետագա տեքստում՝ Կողմեր)։

Կարևորելով տարածքային կառավարման մարմիններում կոռուպցիոն ռիսկերի նվազեցման և կառավարման արդյունավետության բարձրացման մեթոդական ու մեթոդաբանական օժանդակության հրատապությունը,

Անհրաժեշտ համարելով պետական կառավարման (այդ թվում՝ տարածքային կառավարման) մարմինների կողմից պետության անունից հանրությանը մատուցվող ծառայությունների որակի բարելավումը,

Զգտելով հնարավորին չափ նպաստել քաղաքացիների շահերի և իրավունքների ուսնահարման կանխարգելմանն ու որոշումների կայացմանը նրանց անմիջական մասնակցության ապահովմանը,

Առաջնորդվելով օրենքի գերակայության և բարոյական վարքագծի հավասարակշռությամբ, առաջնայնություն տալով մարզպետարանում պետական ծառայողի բարոյական վարքականոնի մշակմանը և ներդրմանը,

Գնահատելով Ասոցիացիայի դերը որպես կոռուպցիայի հաղթահարման ոլորտում իր ներկայացուցչական ստորաբաժանումների շրջանակներում մարզպետարան-քաղաքացի հարաբերություններում տեղեկատվության փոխանակման լրացուցիչ միջոց,

Ընդգծելով տարածքային կառավարման և տեղական ինքնակառավարման մարմինների հարաբերությունները կարգավորող արդեն ընդունված և ընդունվելիք նորմատիվ ակտերի վերաբերյալ կայացվող որոշումները հրապարակային և թափանցիկ դարձնելու, տեղում լուսաբանելու, ճիշտ ըմբռնելու ու կյանքի կոչելու գերակայությունը,

Կողմերը կնքեցին սույն Համագործակցության Համաձայնագիրը (հետագա տեքստում՝ Համաձայնագիր) հետևյալի մասին.

1. Համաձայնագրի նպատակները

1.1. Կողմերը միավորում են ջանքերը հետևյալ նպատակներով՝

- նպաստել ՀՀ Շիրակի մարզում կոռուպցիայի կանխարգելմանը և կոռուպցիոն ռիսկերի նվազեցմանը,
- աջակցել ՀՀ Շիրակի մարզում կոռուպցիայի դեմ պայքարի արդյունավետության բարձրացմանը,
- բարձրացնել ՀՀ Շիրակի մարզի բնակչության կոռուպցիայի դեմ պայքարի անհրաժեշտության վերաբերյալ իրազեկության մակարդակը,
- նպաստել կոռուպցիայի դեմ պայքարում քաղաքացիների շահերի և իրավունքների պաշտպանությանը,
- նպաստել կոռուպցիոն ռիսկեր պարունակող օրենսդրության ընթացակարգային և համակարգային փոփոխությունների կատարմանը:

2. Համագործակցության հիմնական սկզբունքները

2.1. Սույն Համաձայնագիրը սահմանում է Կողմերի միջև համագործակցության հետևյալ սկզբունքները.

- Կողմերի միջև համագործակցությունը հիմնված է ՀՀ Սահմանադրության, ՀՀ օրենսդրության, ՀՀ միջազգային պայմանագրերի և սույն Համաձայնագրի դրույթների վրա,
- Համագործակցության ընթացքում Կողմերն առաջնորդվում են համադեկլարման, համապատասխան պատասխանատվության, թափանցիկության և ժողովրդավարության սկզբունքներով:

3. Համաձայնագրի ուղղությունները

3.1. Կողմերը համաձայնվում են ՀՀ Շիրակի մարզում իրականացնել հետևյալ գործունեությունը.

3.1.1. Ասոցիացիան պատրաստականություն է հայտնում՝

- Քաղաքացիներին հնարավորություն ընձեռել արձանագրելու իրենց հանդիպած կոռուպցիոն դեպքերը և բողոքներ ներկայացնելու մարզի պետական կառավարման և տեղական ինքնակառավարման մարմիններին,
- Տրամադրել անվճար իրավաբանական աջակցություն՝ պետական և տեղական ինքնակառավարման մարմիններին ուղղված դիմումների ընթացքին օժանդակելու նպատակով,
- Բացահայտել կոռուպցիային վերաբերող օրենքների և այլ օրենքների ու որոշումների իրականացման թերությունները, ինչպես նաև մարզի պետական կառավարման և տեղական ինքնակառավարման մարմիններում առկա կոռուպցիոն ռիսկեր պարունակող գործունեության տեսակները՝ անմիջապես տուժող անձի կողմից ներկայացված արձանագրության հիման վրա,
- Մինչ քաղաքացիները կոռուպցիոն դեպքերի հանրայնացման և օրենսդրորեն նախատեսված այլ ընթացակարգերի ապահովումը, գործընկերության հիմքի վրա մարզի պետական կառավարման և տեղական ինքնակառավարման մարմինների հետ համատեղ քննարկում ծավալել կոռուպցիոն տարրեր ընդգրկող դեպքերի կապակցությամբ, համատեղ եզրահանգումների ակնկալիքով,
- Ապահովել քաղաքացիների և քաղաքացիական հասարակության կազմակերպությունների մասնակցությունը՝ տարածքային կառավարման և տեղական ինքնակառավարման մարմիններում կողմից քաղաքացիներին մատուցվող ծառայությունների որակի գնահատման նկատմամբ մասնակցային մոնիտորինգի իրականացմանը:

3.1.2. Մարզպետարանը պատրաստականություն է հայտնում՝

- Աջակցել Ասոցիացիայի կողմից քաղաքացիներին տրամադրվող այն տեղեկատվության ամբողջացմանը, որն անմիջականորեն կապված է քաղաքացիների բողոքներին առնչվող օրենքներով, ենթաօրենսդրական ակտերով, կանոնակարգերով կամ ներքին փաստաթղթերով պայմանավորված ընթացակարգերի հետ,
- Հիմնվելով ասոցիացիայի կողմից մարզում գործարկվող Շիրակի հակակոռուպցիոն կենտրոնի (հետագա տեքստում՝ Հակակոռուպցիոն կենտրոն) կողմից հավաքագրված և վերլուծված տեղեկատվության վրա՝ օրենքով վերապահված լիազորությունների շրջանակներում, նախաձեռնել կոռուպցիոն ռիսկեր պարունակող օրենսդրության ընթացակարգային և համակարգային փոփոխություններ,

- Նախաձեռնել Կողմերի մասնակցությամբ մարզպետարանում՝ քաղաքացիական ծառայողների, իսկ տեղական ինքնակառավարման մարմիններում՝ համայնքային ծառայողների էթիկայի կանոնների կիրարկման համար անհրաժեշտ ինստիտուտների ներդրմանը, այդ ինստիտուտներում ապահովելով քաղաքացիական հասարակության ներկայացուցիչների ներգրավվածությունը,
- Աջակցել Հակակոռուպցիոն կենտրոնի առաջարկություններին, մասնավորապես՝ տարածքային կառավարման և տեղական ինքնակառավարման մարմինների կողմից քաղաքացիներին մատուցվող ծառայությունների որակի գնահատման նկատմամբ մասնակցային մոնիթորինգի իրականացնելու նախաձեռնություններին:

3.1.3.Այլ դրույթներ

- Պարբերաբար աշխատանքային քննարկումներ կազմակերպել Կողմերի ներկայացուցիչների մասնակցությամբ քաղաքացիների դիմում բողոքներին ընթացք տալու և դրանք բավարարելու օրենքով նախատեսված ընթացակարգերը ճշգրտելու օրակարգերով,
- Կողմերից որևէ մեկի առաջարկության դեպքում Սարգսյանի կամ նրա համեմարարությամբ Սարգսյանի տեղակալներից որևէ մեկի մոտ անց է կացվում խորհրդակցություն՝ ճշտելու համար Հակակոռուպցիոն կենտրոնի և պետական կառույցների համատեղ գործունեության հարաբերությունները:

4. ԵԶՐԱՓՈԿԻՉ ԴՐՈՒՅԹՆԵՐ

4.1. Սույն Համաձայնագրով սահմանված համագործակցությունը համակարգվում և վերահսկում են Կողմերի ղեկավար մարմինները՝ լիազորված անձանց միջոցով:

4.2. Սույն Համաձայնագրում փոփոխություններ և լրացումներ կարող են կատարվել միայն Կողմերի փոխադարձ համաձայնությամբ՝ համաձայնագիր կնքելու միջոցով, որը կհանդիսանա սույն Համաձայնագրի անբաժանելի մասը:

4.3. Սույն Համաձայնագիրը կազմված է երեք էջից, հայերեն լեզվով, հավասարազոր իրավաբանական ուժ ունեցող երկու օրինակից, յուրաքանչյուր կողմին տրվում է մեկական օրինակ:

4.4. Սույն Համաձայնագիրը ուժի մեջ է մտնում ստորագրման պահից:

ՀՀ Շիրակի մարզպետ՝	«Հայաստանի երիտասարդ իրավաբանների ասոցիացիա» հասարակական կազմակերպության նախագահ՝
Ֆելիքս Ցոլակյան	Կարեն Զադոյան
  Կ.Տ	  Կ.Տ



